

փայտ սաստիկ յոյժ: 20 Իբրեւ հանին կուտեցին զփայտն, խորհէին թէ հուր պիտոյ է, որով զփայտն լուցցուք: 21 Յանկարծակի ինքնին լուցեալ փայտն հրով վառէր. եւ նոքա յարուցեալք գոհացեալ, զաղաւթն կատարելոյ՝ մատեան արկին ի խորովս, եւ բազմեցան եւ մատեան յուտել: 22 Եւ իբրեւ կերան յագեցան, եւ պետք եղեալ ըմպելոյ ջուր՝ յոտն եկաց սուրբն Ներսէս, եւ մատուցեալ փորեաց զաւազն ի կղզուջ, եւ բխեաց աղբեր՝ ջուր քաղցր աւոյշ, եւ անտի ըմպէին որք հանապազորոյք էին ի կղզուջն:

23 Յայնմ կղզուջ զայս արհնակ կերակրեալ լինէին ի ծովէ անտի. եւ հանապազ մխիթարեր զնոսա սուրբն Ներսէս, եւ ասէր. Այսպէս յիշեցէք եւ ի մտի կալարուք զբանն Տեառն զոր ասաց, թէ *Խնդրեցէք վարքայութիւն Աստուծոյ եւ վարդարութիւն նորա, եւ այն ամենայն տացի եւ յաւելցի*<sup>ա</sup>: 24 Տեսէք, եղբարք, զի ահաւասիկ իբրեւ հայր յորդիս մատուցեալ է առ մեզ Աստուած՝ խրատել զմեզ, զի զմեզ պիտանիս արասցէ, եւ զանունն քաջութեան ժառանգեցուցէ մեզ, եւ զմեզ մեծաց վարձուց արժանիս արասցէ: 25 Չի զպատճառս սակաւիկ առաքինութեան ի մենջ խնդրէ. այնչափ միայն, զի սիրեսցուք զնա. եւ ապա զանթիւ զանչափ զանկշիռ զանհամեմատ բարեացն առնէ զբարերարութիւնս սքանչելեաց իւրոց. եւ ցուցանէ զբարիատուր զերախտապարգէ հատուցմունս վասն իւրոյ մարդասիրութեանն: 26 Քանզի եւ զանձն իւր ոչ ինստեաց դնել ի վերայ մեր, այլ կերակուր եւ ըմպելի եւս եղէ մեզ:

27 Եւ այսպէս հանապազ հանդերձ եղբարք գոհանալ եւ արհնել զՏէր Յիսուս Բրիստոս, զցայգ եւ զցերեկ կային ի պաշտաման Տեառն անդադար: 28 Արեգական մտանելոյ կային եղբարքն, եւ ապա տերունատուր կերակրովն ուրախ լինէին, յընգենուլ արեացն ի պատրաստել զկերակուր: 29 Իսկ սուրբն Ներսէս յեւթն աւուրն ի կիրակէին հասեալ միայն, ապա ճաշակէր: 30 Այլ զայս արհնակ համակ տայր նոցա զքաջալերութիւն սուրբն Ներսէս ամիսս ինն, որ եղէն յայն կղզուջ:

#### ԳԼՈՒԽ Է.

1 Յաղագս Աստուծոյ սքանչելեացն՝ որ եղէն ի Ներսէս եւ կամ ի Բարսիլիոս. եւ վասն նախանձուն Եւսեբի եպիսկոպոսի առ Բարսիլիոս:

2 Իսկ եպիսկոպոսն Կեսարու Եւսեբիոս յորժամ ետես զգարմանալիս զնախ իջանել զաղաւնոյն՝ որ եկն ի յերկնից, եւ հանգչել նախ յերիցապետն Կեսարու սուրբն Բարսիլիոս, ի դժկամակ միտս լինէր ընդ նմա. եւ տեսանէր զնա իբրեւ զիւր<sup>1</sup> հակառակորդ եւ զթշնամի: 3 Քանզի հռչակ հարեալ էր ընդ երկիր ամենայն. ասէին եւ պատմէին՝ թէ յորժամ ձեռնադրէին զսուրբ կաթո-

<sup>ա</sup> Հմմտ. Մատթ. 2 33:

<sup>1</sup> Յոր. գոր